

01/08/2002

Tiga ketua negara tiba di Langkawi semalam

DIALOG Antarabangsa Langkawi-Global (LID-Global 2002) yang bermula esok, adalah kali keenam diadakan sejak dimulakan di pulau peranginan ini pada 1995.

Seperti di Maputo, Mozambique dan Munyonyo, Uganda, masing-masing pada 2000 dan 2001, dialog itu meliputi LID, Dialog Antarabangsa Selatan Afrika (SAID) dan Dialog Antarabangsa Afrika Timur (EAID).

LID yang dianjurkan Commonwealth Partnership for Technology Management Ltd (CPTM) dan Kumpulan Industri-Kerajaan Malaysia bagi Teknologi Tinggi (Might) kali ini bertemakan Ke Arah Dunia yang Lebih Pintar - Meningkatkan Keselamatan dan Kemakmuran Untuk Pembangunan Melalui Perkongsian Pintar.

Hari ini, tiga ketua dan pemimpin kerajaan tiba di sini untuk menyertai dialog yang akan diadakan selama tiga hari di Pelangi Beach Resort, Pantai Cenang.

Antara mereka yang tiba hari ini Perdana Menteri Mauritius, Aneerood Jugnauth; Presiden Namibia, Dr Sam Nujoma; dan Timbalan Presiden Afrika Selatan, Jacob Zuma.

Menteri Kewangan dan Perancangan Pembangunan Botswana, Baledzi Gaolathe tiba semalam.

Perdana Menteri, Datuk Seri Dr Mahathir Mohamad yang juga penaung dan penasihat LID-Global 2002 akan tiba esok untuk menyertai dialog yang diadakan sehingga Sabtu ini.